

蕭
碧
堂
集

清碧堂集卷之十四

石公表宏道中郎撰

麻城李長庚酉卿閱

碑

荊州脩復北城碑記

郡國之有城猶人之有肢體也體與神相載則
為平滿為勻適今有人焉慕偉衣冠者之魁然
而恢其一臂途之人爭笈之夫夫贅耶不然則
病臃腫者也荊州城不知所自闢路史曰夷王

時楚熊渠長子康國句亶即今江陵疑初置始
此楚志以為蜀壯繆侯所築桓南郡增脩之考
史亦無確證然溟洪記載唐元和中裴宇瘞石
室後人掘得其狀與江陵城同而蘇子瞻亦言
江陵南門外有石狀若宇陷于地中而猶見其
脊近歲繕南城乃得之故識者謂此城規度似
有所受更閱時代未敢輒增減萬曆壬午始拓
城北隅取方幅而地故凹肆廬不具每春夏間
積潦浸城根時有崩剝居人相視以為附贅無

所用殷殷然世一割之為快吏斯土者議藉藉
久未決今監司周公至環視嘆曰夫荆固四達
之區古戰場也時平則百雉為具一旦有警無
寸嶮可阨而萬城之水朝決朝注高與堞齊名
雖曰城其實塹也舊址因高為壘蜿蜒皆地骨
辟如載齒于齧可以噉堅今城皆窳田畦之且
漬載齒于脣豈其有任且夫墉陴置堙以客焚
葦無用一也第宅區署巷陌亭園填城中不足
而何有此下澤無用二也荆自徙城以來閭井

蕭條冠帶之倫悉減往籍故一時形家亦以為
病大都制不當其形是謂緩形不束其氣是謂
漏緩與漏皆不足以發生而導祥此天地自然
之節宣非臆決也夫百利而十害猶曰不可況
其無用以賈害也公遂力主復城議與先太守
徐公今守費公擘畫既定以歲某月始事凡幾
月日而告成以丈計之得若干丈高厚如舊城
制凡用金若干鍰城成而民不知役公實心任
事念念皆經國長計郡邑大政無不畢舉一時

良二千石及丞以下皆卓卓有民譽故能相與有成我民世世實覆載之是役也檄脩則某監脩則某督修則某皆殫力此城例得並載

東門護城堤記

公安治倚江江水齧岸者百有餘年至近歲遂割城之半以予水議者畫為三說以上一曰避勿與爭道也將盡撤其堂皇間井以就高而公私困竭不與者十常七也二曰築石堤於江之上流以殺水堤虹偃而出水勢北走迤南一帶

庶免衝激而勢湍速投之石未必膠委千金於
洪流途之人知不可也三曰疏二聖洲之故道
以分江勢夫江身在南水去原而就洪疏之不
勝淤也策乃下會直指使者應公行部至邑愀
然嘆曰江患逼矣而江議迄無定畫居者危危
若簣下之火愚則處堂抑豈無智者也江防使
者徐公進曰適與薦紳父老言未竟也邑三面
負堤而缺其東孟公堤垂右臂下楊令增其支
為前障往年江決東門邑居漂盡者左臂虛故

也邇來江患少定幸萬一之復而峻其左可以
墨守此百廿之計也應公曰善是邦也詘詘又
不可以需則為邑出醵若干監司郡大夫而下
損貲各有差閱月而堤成邑士民相與歌舞於
市皆曰徹直指使者重念災國不及此子輿曰
以佚道使衆則不怨況其不使且為出貲以貸
命也一時善形家者皆言邑形勢自西壯來後
疊而前削截之以隄則氣留宙則能為諸祥耳
於邑為左左龍屬也地宜豐形勝之所資也是

役也興盈庭之議頓止自忠襄公以來未之有也

新修錢公堤碑記

澤國之有江警猶西壯之有虜警東南之有倭警也倭虜之患至于莫夷我赤子蹂踐我城郭而水之害正等故捍衛之功比于折衝邑故窪澤割江身為都每入夏後峽水暴涌雲昏天回幾撼地軸白浪躍雉堞出居民望之搖搖然夜則萬雷殷枕甫就席輒彷徨起若此者十餘日

或五六月每歲率三四至以為常倉皇有警則
扶白負稚走郭西之斗堤涕泣之聲聞數十里
而堤故孟公舊址前此去江遠今蠶食且半文
村之水直擣其背萬一水從後決地勢面雖高
而方張之怒猝不得洩必且為旁齧必且為橫
激我民欲別走則四顧皆壑如坳堂之螳急而
趨芥及芥一漂不可保則固末如何也已數十
年來邑人岌岌議增護堤當事者檄縣覆按竟
中革而慈谿錢侯胤選以甲辰之秋來牧芟積

舉廢凡我民之所疾如其疴不盡其蠹不止也
凡我民之所急如其家不擇怨勞險易慨然當
之無邀倖無却退邑人士知侯將大有為遂先
以堤為請而革議者有數堵畝虞其壓輒欲踵
故械侯陰悉之偕今丞周君墜躬自按行見遮
道者數輩侯逆問曰是故楊二堤址雖微可尋
也若何訴數輩伏曰故堤也何敢言而堤之一
角塚壘壘穿之則暴骸避之則廢工柰何侯顧
丞笑曰若以余等不習其鄉令賄者曲為導可

謾也叱騶人後去輿蓋與丞偕步叢艸間顧謂
役夫曰視吾趾所及即為堤徑行至關廟前率
曠土無半鬣群輩以為神皆股慄反走量之得
若干丈分丁夫若干名丞周君督率之閱三月
告成諸父老有識者謂其子弟曰若無謂此舉
易也當江防徐公建議時首為臺使者言狀使
者而下愀然動色至為出鍰趣具議上而一時
狐鼠竟以他議奪皆出于上而難今出于下而
易若謂侯何等父母也江防者舊郡守堯莘也

嗟夫今江水之憑陵靖康以後之虜也邑頻徙
頻却大似南渡之跼蹐幸此堤復我民倚斗為
長城聞侯又欲䟽壯江之故道以分水勢如此
則中興可望也諸澤國皆有堤雖甚重而無關
司命唯是堤與我民為存亡堤與我民為存亡
故知侯與我民者命也非堤也夫閫外之寄唯
命則重余之比于折衝非過也是記也固燕然
之勒也

公安儒學梁公生祠記

天之大也無所不有而非挾其有以角也聖人亦然使天哢哢然與春爭華與秋爭實與萬物爭洪纖大小天亦物耳故聖人之大以受不以勝天下之為道者岐矣其道皆竊吾近似者也吾僕役之則吾用而角之必且外吾而求張故以宣尼之聖而識小師老聃問道不以是貶大暨於後儒挾吾之所有以求勝而吾之道一變而儒始名再變而儒退然居九流之列三變而儒乃有為異道用者是則角之而張者也且夫

諸子百家固未有能出吾範者也。焚而為名法
比而為楊墨。遁而為老釋。唯其竊吾似而甚焉。
則指之曰異學。而實不出吾之所有。夫聽所言
觀所行。譽所試。是聖人未嘗不名家也。春秋之
斧鉞雖隱。必誅。是聖人未嘗不法家也。吾蔬食
而愉快。其樂我席。不溫轍不解其愛。兼是聖人
未嘗廢楊墨也。寢有經。食有戒。是聖人未嘗廢
攝生也。幾研於未發。道竟於無聲。臭是聖人未
嘗廢虛無也。唯其無所不有。而出之以平淡。故

其大至於不可名異學者竊其一以求專其譽
故迹詭而言放以為不如是不足以自崇其道
而不知千變萬化皆不出吾儒之固有吾取其
精以供吾用而汰其甚告之以所蔽彼亦且樂
為吾用吾覆之以天臨之以君庇之以父母彼
安敢出而為吾害唯吾自狹其道而與之角居
然以敵名予之而彼亦傲焉以敵自居於是異
端之禍與吾儒相終始名曰尊吾道其實薄吾
藩而益賊以戈者也孟氏善衛道者其言不過

曰歸斯受曰反經而已矣反經者使天下曉然
知常道之大而本之身以措天下皆綽綽然而
有餘吾常有餘而彼不足又安用借資於彼天
下皆知吾之不借彼所謂濯龍之宮白馬之舍
其黨不得不少而道自衰此所謂不攻而破者
也故今之欲廓吾道莫若遵孔孟之家法而明
其書暢其旨先是中丞梁公以監司臨敝邑見
學公杞慨然捐鍰新之每至邑則進諸生徒告
以聖賢之微旨其言朴直無彫飾已又出書傳

若干多先儒之所未發蓋公之所以衛道者與
孟氏反經之旨千古若一券也昔者昌黎氏衛
吾道徒為忿激之論而不標其本是以介冑衛
也夫介冑所以攻非所以服也今公第發明孔
孟之深旨使人知道之無遺覆而諸子百家無
異載此猶禮樂盛而悍獷銷聖門之伊呂也邑
士民戴公誨爭請祠公邑錢侯聞之甚喜曰是
王政之大者竟如士民請祠成以記屬余余拜
手曰公他日當俎豆於白沙諸公之間者也然

使後世知邑中有聖學自公始公之從祀自敝
邑始一時令長師儒薰其德而快其事而不肖
某得以文字濫其役是皆不朽之藉也公名雲
龍廣之瓊山人楚人戴公如羊叔子今者特祠
黌序間故略述其功在聖門者其他威惠不具
載以俟異日志峴首者

公安縣儒學周公生祠記

邑學宮舊濱江江水齧其址宮遂遷邑頻歲苦
陽侯殿村蠹過者岌岌然慮其壓則以孫木贅

之又十餘年而贅者蝕其半邑人相顧嘆惋竟不敢議興革夫邑之薦紳大夫以至縫衣緩帶皆誦法孔氏者也積縷而緡積塵而嶽邑之人亦能辨此獨以事重而地卑故不敢不緩其議以俟天子之命吏夫今鄉校雖一鄉其始蓋有所受之小至一籩一豆皆奉功令而行不敢輒有增損故學宮之重與太廟等而其興革一稟於天子外焉者遐而不得達則稟於天子之命吏今夫佛老之舍朝而祀焉夕而呼於市市之

屠估傭保操其興革烏合而集事者何則其事
輕也昔李師道請出私財贖魏徵舊宅白居易
論奏以為事關激勸合出朝廷夫此名臣舊第
耳當時惜大體者慎且重若是其敢輕議數仞
之宮牆與必有所操而後議故下之人不得不
緩緩於下而急於上故體統尊而事行古之為
治者政學出于一故曰在泮獻囚在泮獻馘後
之人特以為文章之具觀故其修舉常後於官
寺區署一有興革直付之一二章縫而其事僅

與釋老之宮等於是學宮始輕而絃誦之地鬱
為苔蘚後生末學有經年不窺夫子之門屏者
是亦為政之責也監司周公醇儒也修姱之節
聞於天下天子超常格拔之論者以比胡威陽
道州下車未浹月威愛大行聞邑大成殿敝即
與前分守梁公捐貲撤而新之既命有所榛無
失體衆力遂集而邑人士數十年嘆惋而不敢
議者一旦如釋重負官既成邑錢侯率諸薦紳
士落之皆曰非公余等何顏復見先聖洩洩然

清江先生集 卷二
如唐子之久亡而忽見其鄉也則又曰邑公之
畏壘也將世世子孫俎豆公舍學宮其安之遂
併梁公兩祠於宮之左公名應中浙之會稽人
夫非謂學宮之能重公而學宮待公而重將使
後之作者知其重以時加修飾而後生末學望
宮牆而肅然是祠之所以作也

天皇山護國寺自来佛碑記

張無盡有慈氏瑞像讚蔣氏有記傳者以為天
皇山自来像余初疑之既讀法苑珠林載廣州

商舶事與記畧同然據像乃迦文非補處也時
乃東晉永和年非高氏清泰時也二公或別有所
見耶抑偶得于傳聞而遂據以為文耶按記永
和五年有廣客舟下載未竟夜覺有人奔船跡
之不得而載忽重既達渚宮若有人躍而上舟
遂輕是夕現像於郡城之北鎮牧而下傾懷渴
仰如睹慈母千衆咸迎凝然不動有道安弟子
曇翼卓錫長沙寺聞之嘆曰斯余本誓令小師
三人導之颯然輕舉遂歸長沙後罽賓僧伽難

陀瞻像悲咽謂曇翼曰近失天竺何為遠降此
土詰其年月無不符合細勘像文有梵書阿育
王造四字宋齊以來放光現瑞異迹尤多今其
像貌衣褶已被庸工數髹髣髴不可見字長沙
寺者郡人滕畯捨宅為寺故長沙守也夫宣父
不語怪而至於禘嘗郊社則云不可知聖人蓋
以不可知為怪非直無之也又云治國如視掌
此歡喜讚嘆之極形容不及之詞也聖人蓋以
形容不及為不語非直蔑視之也以為直無而

蔑視此宋儒師心之敝是波旬說非聖說也言者以為堯舜禹湯文武其迹皆平平無他異而釋氏幻詭竒變似非經常之旨夫世代有升降而聖賢之軌轍亦異故禮樂盡而刑書出鞭撻窮而靈恠顯夫盜不知有法也而其詛而誓必質於神故恠之懾人也捷於詩書劍戟故天不有祥雲異氣珮玦流孛之恠則天不畏地不有芝艸靈木崩吼震竭之恠則地不靈夫天地非故為妖異以駭世也所以導聖而警頑也且佛

未始不常其談心談理使人蹈律而行義則固
典彛也聖未始不恠如儀鳳落鳥出罔躍魚金
泥玉簡之錫龍孽水妖之伏固亦世儒之所怖
聞也或曰信爾聖賢奚不恒為恠以攝天下是
不然辟如花之根株梢葉常物也而偶爾一萼
則人爭異萼愈難人愈恠使花而常萼花將不
重花而止於根株梢葉花之廢久矣此佛與聖
賢之微旨也郡侯徐見可以常道治民又推宣
尼謹喜讚嘆之意莊嚴佛廬善巧導世王政所

不廢也林君茂化吳人也郡侯嘉其賢托以茲
殿堅緻完好若鬼工焉其人雅士樂其奇而悼
其廢非區區為福田者也蘇潛夫別有文悉其
事余故不贅

席耳巖不二和尚碑記

余童年熟不二師名以為古尊宿也既而閱元
美伯玉二先生集徃徃道之始知為近代禪伯
然二先生亦以夏臘高嚴事之度其時皆壯盛
二先生既悠游以老去奄忽若干歲白楊可棟

而師白髮如舊時逆其生當在宣成間也諸徒屬試以臘叩不答嘗檢其篋得舊纈衣忽云此武皇帝七年王城中施食所得衣也扣之復不答或云師名圓信京兆之房山人薙髮白雲山禮大僧德敬為師往來上方紅螺之間二十餘年行脚所至為武林淮安六安終南每住輒數載以嘉靖庚申至太嶽駐錫席耳巖穴而哮者爭避匿去師倚石為屋稍稍剪夷其積園瓢數十餘踞石沿澗出入幽花美箭之中者纍纍

如笠巖上蓮池二澗可二丈旱歲不竭蓬室三方廣當身所得一縷一粲盡以供十方遊衲行之數年遂成叢林傾震旦士女號呼悲啼而至者不至帀耳巖猶未躋嶽也至巖不面頂禮者自以為慳緣必痛哭去否則謹伺巖扉外經數日得一見則喜過望歸而對妻子言猶有矜張之色以故帀耳巖之名遍天下好奇者至附益之以古神僧事家譚戶豔雖韶男稚女靡不道計賢士大夫之轍以日至尚方之賜掖庭之供

以月至自嘉隆以來耆宿之著聞未有若師者也然師務為密行不以解顯應機之言多依孝敬撫摩煦煦猶乳母之於驕子金錢湧而至拒納有贈輻者付常住作供四十餘年影不出山跌坐一龕中如朽株雖利根之士好為奇談詭學者睹其顏莫不肅然增敬余慕師久常以其耄恐不及待今年侍大人山行獲一拜師於巖間師貌甚腴額隆隆起至頂光滑可鑑短髯數莖如雪見人闔其目聞根甚利語清健望而

知為有道會 慈聖出內藏金為師治塔塔甫
成而余至師之孫真慧等以記屬余世系年甲
既不能詳不敢妄載庚申以後詳之抑其大者
至若遊人之所傳好事之所述俟他時入山實
而志之今未暇也

徐景鳳元輝叅訂

門人袁升度無涯初校

吳士冠相如手書

瀟碧堂集卷之十五

石公袁宏道中郎撰

麻城李長庚西鄉閱

誌

余大家祔葬墓石記

余先世自黃移南郡蓋武胃也至王父左溪公
行而族始著課子弟章句業冠里中至余大人
行始文冠諸生至余兄弟輩而魁海內者一籍
金閨者二舉賢書者一遊槐門黌舍之間者幾

四十餘人計高祖有倫公至余輩凡五世族指
幾三千許族兄弟子姪或不能字騎而遇道上
不能貌或不下亦下里之冠族也先世闕記載
大王父至遺其字其遺行逸事惟王母余大姑
能道其略余嘗問大姑大王父何如人大姑曰
聞之先姑言隱而豪舉者也出入必帶劒馳怒
馬着鞬韜衣嘗遊柞林雙田之間遇魁盜數十
人怒領家僮格鬪立斃之遇歲殍則煮糜以飼
饑者所活不可計問王父則曰余不知其他記

嘉靖之廿三四年間出母金以千計出穀以萬計時鄉邑饑甚王父取其券盡焚之蒼頭輩扃而飼恐其責負也是年而父生生平不識邑大夫門所交為而外大父龔公作吾曹公時為貧諸生困甚延之讀書傾肝膽交焉龔公後舉進士官至河南左轄曹公舉歲進士其豁達知人多此類余私嘆曰是泰氏所以盛也欲為家乘未果去歲使回大姑耄矣欲就枕蓐間詳而私志之會卒嗟夫大姑生於邑之先主營為正德

之乙亥歲十月廿長而歸于表嫡姑丘嚴栗艱
難辛楚備嘗之矣大姑怡然不色忤也戊戌舉
長姑己亥丘亦舉二姑甫數月耳釋長姑乳乳
之癸卯舉余父甲辰丘亦舉余弟甫數月耳釋
余父乳乳之庚戌丘大姑卒王父委之家政撫
二孩絕痛婦二姑也先於長倍其奩二姑所歸
家儒而貧姑資給之十餘年後二姑病姑念之
至絕食一日晨起有鳥投姑懷宛轉而死姑慟
哭未絕聲而訃至其至性如此戊午王父即世

二姑藐然家益落大姑起之如王父時課余父
舉子業令之就學不復干生產事余父以是為
諸生有聲歲乙亥余母卒所以撫余兄弟姊者
如余叔與姑也噫姑之矣復母之矣尚何言哉
歲己卯余兄舉于鄉大姑為一開顏丙戌試南
宮第一戊子不肖孫宏繼舉於鄉壬辰復得雋
大姑乃輾然喜曰袁氏二世無冢婦矣余畢世
為袁氏勞薪攻苦茹燥不遺餘力天高地遠以
有今日他日見先府君地下有詞矣甲午余謁

選大姑執余手而哭曰爾有王事八九十老人
豈能待爾耶去有爾父在莫念我也余時感傷
甚康子長兄與余及三弟皆由京邸大人書來
云大姑病痛念兒輩前者廢箸數日爾妹冠進
賢拜床下曰兒歸矣大家喜見齒遂進食余兄
弟把書腸為之裂時伯脩直東華日講國本未
定侍講筵者纔三人何忍言退小脩試事迫余
方官太學例不得請每相對而泣無何余轉春
官卽私喜曰是有間可以見大姑矣遂以秋試

終之月挾弟南歸歸而拜王母於床下則猶喜也至仲冬之廿五日病革遂不起時亡兄訃亦至嗚呼痛哉嗟乎計袁氏三世子孫寸摩而尺拊之皆大姑也山之毛地之產丘之塊皆姑積之筐箱而納之辟統者也今長安數十里外見豐林茂竹蒼秀如山松栗槐栢干霄翳日者皆姑之手植也姑性好施非知有施之義與其報貧則憫之而已性忘人過非知有捐忿之義與市德怨則消之而已噫此聖質也冰霜以厲之

陽溫以發之日星以照之欲不發生可得乎欲
長子若孫者但觀大姑之行及先世之所以長
雖百世茂可也將以辛丑年十月三十日祔塋
王父左溪公鳳山之原孫不敏敬書其事於石
以告後人左溪公諱大化年四十六卒大姑子
一為余父 勅封翰林院編脩孫男五長即余
兄宗道官至右春坊右庶子兼翰林院侍讀次
宏道次中道國子生次安道寧道俱邑諸生曾
孫四嗣宗道者祈年中道子也宏道子曰彭年

安道子曰椿年丘大姑子一為余姊士玉女一適太守王公弟槃早卒孫男四馬鬣而封者三中即王父其西則丘大姑也

少溪袁公墓石志

姊少溪公諱士玉與余父封公同出王父左溪公而母別七歲失冢母丘母於封公母余大家弱好弄挾瓦注走里閨酒後耳熱出所彈雀炙之遍啖諸年少王父愛憐之不之禁十五歲孤封公止長一歲任家改而公嬉狹如故性癖馬

廐中皆良駒懸高貴不肯售不致遠但日馳湖
莽間風髯霧鬣望若龍種觀其蹴踏嚙脊驕嘶
鼻語以為快未雞鳴輒起櫛沐衣冠而立庭中
命臧獲牽駒出然松而照之視其飢飽芻抹而
後放晚則從山頭望歸塵欬齒而笑為人魁碩
長悍壯飲食日攜楸枰偏挾五木挾諸客走馬
雙田孟溪間劇飲徹晝夜四十年如一日未嘗
一刻奔走公私作人間勞薪事也公生於嘉靖
甲辰享年六十子四人孫十一人以癸卯十一

二十日附葬鳳山之原分丘姑之鬣而封之
左則先王父與余大姑也將終以銘屬余姪宏
道乃搦管獻歎而為之銘

銘曰支公神俊武子馬語癖則癖矣猶勝孫子
荆之嗜黔技

詹大家壙記銘

余在抱即多病母不忍自育托於詹大姑恩倍
母甫六歲即失母時中道第方四歲皆育於大
姑以是余等至成人無失母憂徃余令吳大姑

年七十有五會小病余為之乞休者三語在去
吳牘中時吳中數百萬入相率散緡飯緡為大
姑求福冀以畀余余不許則又籍其名請命於
城隍願各捐其壽十日以壽姑余不忍竟畀然
胸中自是鬱鬱不半載遂病乞歸益力閱六月
不得請大人書來云詹姑方健兒謁部得改歸
未遲遂入改京坻授又不獲歸然大姑益善飯
闕二歲由國子教除儀曹始乞差還大姑白髮
髮扶鳩杖出勞余泣且喜既事竣余遂乞病杜

門侍姑二年乃卒享年八十一餘一月及七日
時萬曆壬寅十月之廿五日也卒之日家大人
封公哭之慟謂余曰兒但知母若等不知實母
余也余生值嫡嚴厲姑釋已女以乳左手襁右
執衣褥浣烏艱辛百倍無弗恬也頃之余出就
僮舍凡餅餌果炙之屬辱而出朝而飼烏朝而
出昏而飼烏問之則皆大姑百計以具者也汝
王父見背時姑年纔三十餘族長者憐其少且
無子女強之改適姑以死自誓與余大姑共持

家政余時弱冠就外傳所以督余者甚力甫成
立而汝母即世二十年勞瘁汝所目也及汝兄
登賢書汝姊嫁汝二人始束髮而冢婦曾復去
世三在抱男女復托命烏嗟夫袁氏三世皆姑
懷中物也言已復哭諸孫及諸眷屬皆慟哭不
肖孫宏道哭而勒諸石且系以銘
銘曰荷葉山之翦翦三官塚之童童協余夢是
惟淨土之近封女禪兒海嬉以從

勅封孺人廖氏墓石銘

孺人廖氏為先庶子伯修兄繼室少庶子七歲
年十八乃歸時伯脩方為孝廉既官翰林遂封
孺人隨伯脩燕邸者十二載家居前後凡五載
稱未亡四載得年三十八以萬曆甲辰八月十
八日卒於寢孺人性醇和貞粹相夫子以義畜
妾媵以恩伯脩亡意緒殆不欲生持齋繡佛日
夜期地下伯修甫襄事遂命斲棺治鬼衣若遠
行之裝束恬然安之未及二年而逝嗣子祈年
將以是年十二月一日安葬於先庶子墓旁相

距丈許遂為之銘

銘曰原之右為姑若夫原之左為子若姪夜臺之聚首勝白日之歡泣性溫而貞不媿姑也操嚴而潔不媿夫也唯其不媿是以含笑而歸願佐夫子於黃壚

夷陵羅子華墓石銘

羅公諱文彩字子華先世隱居蘇之洞庭山祖欽賈往來楚蜀間愛夷陵朴雅遂家焉欽生怡是為懷湖公怡生三子伯文錦季文鑑公其仲

也生而穎異日記數千言為偶聲輒隨口應而公以近籍恐為里閭所欺遂罷習舉子業與伯同賈私携古文詞讀之遇山水佳處乃流連忘反伯叱之曰世豈有牙籤籌子青山賈兒耶公謝之不顧也已乃獨賈日則篝緡夜則鉛槧如初利輒倍他人橐中不遺一錢伯乃嘆服伯蚤逝去懷湖公沒纔三年公慟哭曰天平奪吾父兄之速耶撫伯子如所生擇里中英妙為之庭課後皆有聲諸生間未幾公亦三舉子遂去賈

業以詩書為專門性好施予嘗有婦垢面而呼
問其故則鬻身以償其夫貸者也公憫之遂為
代償又買一姬納幣矣已乃聞其故夫不能成
禮改而別字者公乃資之合歡幣帛一無所問
有貸其貲以賈者日走青樓中貲蕩盡以居求
償公憐之曰少年幸莫入輕肥場吾不汝迫也
遂焚其券公嗜琴晚年好益甚嘗曰袁孝尼不
傳廣陵散世豈遂無音耶吾性在山水指間勃
勃常有流泉遠澗不顧聞人間鶻絃鏗撥聲也

峽州之解琴自公始少時嘗與客奕客先一道
不能勝公忿而歸取局譜觀之精思半月遂兩
先客人以是服其敏居家務為儉素淳朴所餘
輒施修剎造梁無虛歲再飲於鄉後輒辭暮年
皈心蓮邦課誦至忘寢食既病不服藥唯誦極
樂如常一日呼洗浴甚急諸子泣曰陰陽家言
時日不利柰何公輪指曰明旦當利為汝等一
日留至期乃合掌曰門外有高衲携我入七寶
池矣遂端坐而逝享年七十有二歲配王氏即

少宰兄柳溪公女賢淑聞於鄉黨先公二十六
年卒子三長冠國子生次冕廩諸生次旒州庠
生皆以文藻知名于時而冕留柳浪湖一月與
余倡和最久異日不媿木天石渠之選者也孫
男十繼室盧氏撫育諸子無異已出先公十年
而卒卒之歲公長女夢其先升文鑑謂曰汝父
母數俱盡汝父以陰德當延一紀至是始驗於
是冠等以某年月日合葬於河西之後庄而乞
銘于余

銘曰是以菩薩檀度莊嚴其身者也是以周孔
禮樂訓其子若孫者也是支那國之善士而蓮
花七寶土之氓也

司馬孺人墓銘

孺人司馬氏邑之谷昇里人年十六而歸余同
高祖妣冰壺公逮事舅姑若干年克盡婦道舅
即德興縣貳龍潭翁也翁甫得官即解綬歸優
游田里間稱善士村故多盜翁甘雄於貴徒避
不常孺人佐妣為層樓居翁姑其上翁喜謂里

人曰吾今日始覺高枕之為甘也翁晚歲獲享耄期壺觴嘯詠比于陶白者并與孺人之力也并育隱德捐已之急以卹困至于橋梁舟楫便即施之以故家遂貧孺人安之督課僅力嚴慈有方家無羨財而佐夫子以行德者行之終身不巖迨庚子秋伯子宗郢舉于鄉里人乃竊嘆曰是乃若夫婦所為封殖者也次子宗成邑庠生子某某甫弱冠皆有雋才伯子得雋之三年而孺人卒是為甲辰春年若干歲窆于先姑之

左宏道曰谷昇世出賢女康子之捷三人余家兄弟先後得雋五人皆錫于谷者也偶然耶抑地靈耶兩村相隔一帶水當為將來佳話

銘曰其婦也範其母也式胡不耀之三光而襲之九地是宜隆其封傑其制去此三年天語將至

兵部車駕司員外郎龔公安人陳氏合葬墓石銘

壬寅冬十二月望駕部龔公偕余往二聖禪林

是夕建三聖閣寒月燭林如洗夜半公呼余出
笑曰此坡公承天院舊案也吾兩人乃復繼之
呼同事數少年不應苦邀之以霜威辭公曰少
年何衰憊甚豈若老健耶徘徊霜月下余體粟
漸不支而公愈勃勃余私念曰是壽者相也後
四日丙夜忽有叩門聲甚急余披衣起問之則
曰公暴卒余不韋而馳至則公瞑目數刻矣公
精斫性命至晚乃通釋氏不葷血者三年高才
博學於書無所不窺每得異典躬自讐校蓄書

至萬餘軸邑人士稍知慕古者公與兄先太原
之力也性寬厚恥談人過人有挾械以弄公者
公佯若墮之而實了了後雖負公公亦竟不發
好古圖畫及鐘鼎五畝之宅花竹居半恠石枯
松纍纍几席間亭臺軒楯小不當意輒毀去踰
日更作疏題未竟棖棟已移公竟以此貧然公
不屑也嘗從河社使還見道上柳條孌孌公愛
不已呼役夫伐數枝縛置輿旁問之則曰江南
無此佳柳持歸樹之聞者匿笑及至家僅得枯

株數條而已公猶令置水邊其韻致高遠皆此
類噫此可與齷齪俗兒道耶以使道亦當不解
也公晚歲與余最契所可言者公之粗迹至公
之自得處雖公不能言也公諱仲慶字惟長方
伯公季子而太原令之弟也母曰趙夫人嘉
靖庚戌歲萬曆己卯舉于鄉名第三時先兄宗
道第八里中以為美譚庚辰成進士授行人乙
酉改福建道御史甫再月出為磁州判以疏論
權黨也未幾陞汝寧推官丁亥轉南戶部主事

戊子調兵部車駕司員外郎頃之以內艱歸既而方伯公亦卒公遂無經世意自稱遯菴居士角巾散帶之朋赤髭白足之侶優游茂樹晤言終日者十餘年竟若坐脫以去雖母壽僅五十三然彈指拂石於公何別公之學何學也哉公卒之三年釋服僅踰月公之妻安人陳氏以病瘍亦卒時乙巳之九月十有三日也安人慈慧恭謹事姑嫜以孝育妾媵以恩撫諸庶踰已出好施樂善與駕部同之封安人邑中呼為女聖

先是安人持五十三佛名號甚謹委家僮善書者另錄一紙僮書未半而所置案稍不潔其人復嗜飲是日午猛風捲地一黑衣神擁而入拔是經至安人所居樓前已排空直上霹靂大作市中人見若匹練後有人自城外來云十餘里尚見之竟不知墮處余聞之嘆曰此精誠之感也雖然安人恐將晟世已而果逝余兄弟幼失母安人待之若所生安人之亡也余與中道弟及諸婦皆哭之慟安人生已酉壽踰公四年安

人事公若干歲委曲以怡公者無所不至公甚
敬禮之長子炳聞及女適李氏者安人出子某
及女適鄒氏者皆庶出而次子某早卒炳聞子
三以丙午正月二日合葬特丘東山之原而余
泣為之銘此公志亦余責也

銘曰公歸之日釋者實方夢一大士飄然而南
翔云有善人結伴以行已復有逝而更生者云
見公于琉璃之堂公之侍姬明眉鬢髮仙袂揚
揚笑公之旁儒者曰此荒唐之言也以問袁生

生笑而不荅既而告曰汝見大掣空而直上者
誰之主張耶

舒大家誌石銘

家崇陽舒氏女生嘉靖之壬午家貧父憐其慧
教之新聲走荆郢間未幾至余里見王父左溪
公慈而俠委身年三十餘而王父即母家了然
一身無他男女族長者以其穠李恐不當霜雪
家以死自矢朝紵暮織為余叔督家政甚勤苦
新諸子宗正等家皆母之推乾就濕倍于所生

國操之嚴凜若寒玉稱未亡者五十年壽八十有四歲噫是可銘也矣

銘曰貪泉之水不變廉士之腸蘭生叢棘中不敗其芳唯橘與枳何其易徙聞家之風可以愧死

慈谿錢君墓石銘

慈谿錢侯令余邑朞年而政成以最考聞于朝鄉大夫畢賀侯泣謝曰是先子教也先子居常誨不肖曰而知物情乎衡之所以適者平也水

之所以鑑者澄也春之所以暢者溫也霜之所
以厲者潔也命不肖勒諸佩不肖兢兢龜蔡之
下車以來唯恐一朝戾先子教以為諸大夫辱
其敢言最鄉大夫曰是也是乃戾之所以福我
民者先公持矩平戾則之以程物居心淨戾規
之以用照溫然而煦育耶唯先公之膏液也皎
然而冰雪耶不可犯者色耶唯先公之凜冽也
民等不獲事先公猶幸沐先公之教以生敢不
下拜戾起謝未幾戾持先公狀一通乞銘于余

余唯執役之榮故不敢以不文辭公諱良臣字
顯君其先家于鄞勝國時有均一解元者始徙
慈三傳而為滇少叅森正統壬戌進士也森生
珪珪生鈇鈇生儀即公之父公生而穎異失怙
早能自得師弱冠有信年之知所與交多名士
如侍御向公某太史王公某文學桂公某孝廉
張公某雅以文行推重公稱素心交及桂公早
世向王諸公先後起家而公屢蹶塲屋諸公每
以石交援公弗屑也壯年讀書雲間豪傑多從

之遊如唐君某鍾君某皆出公門下及鍾宦括
蒼遣使迎公公至彼為條利病及諸曹史不職
狀鍾嘆曰始余從先生學謂章句恒事耳今乃
知學之所以仕也余不足以盡先生是數端者
又安足以盡先生學余負媿多矣鍾卒內召為
時名臣云公有至性自以奉養不逮居恒抑抑
卽年當耆艾每一道及則汨潄潄下嘗收邑子
羨金有孔姓者力不及將鬻妻以償公聞之大
驚急寘不問數年後過市間有婦人抱嬰拜公

前者公驚問故泣謝曰此乃向者君所寬也余
夫婦幸得瓦全遂有子此一瓣香為君子若孫
燒也公佯為不知者而避之其既以振人之急
不自為德皆此類晚年自號層峯居士志入山
之深也公疆仕始生邑侯故侯每曰先子盛年
多奇行生也晚遂不及聞傷哉余曰公之學不
可見見于門牆及哲嗣者皆公學之餘也不朽
者三公有其二何憾也昔楊王孫以贏葬而傳
劉伶以酒頌而傳士之垂譽豈必在多哉公生

于嘉靖丁亥九月十六日卒于萬曆戊子四月
九日逝後三年而邑侯舉于鄉邑侯母沈以嘉
靖壬子十二月二十五日生萬曆甲午三月十
二日卒子三長即邑侯名胤選娶趙氏繼娶向
氏仲奇選娶應氏季龍選邑諸生娶鄭氏女一
適諸生羅雲鳳孫男六名標邑諸生名策名籍
俱長出名科名桂名柱俱仲出孫女三亦長出
也將以某年月日合葬于邑東之鄧山乃為之
銘其碣曰

其身之不試而試諸子涓涓者液如波方駛近
則四明遠唯若水畢萬之後必大請誓諸砥

徐景鳳元輝叅訂

門人袁升度無涯初校

吳士冠相如手書

瀟碧堂集卷之十六

石公袁宏道中郎撰

麻城李長庚酉卿閱

疏

聖母塔院疏

荊州碑云智者禪師辭親出家母以甘旨為言
師遂指茅為穗其說頗不經然邑中茅穗村名
始此今聖母塔即其故封也邑自漢唐來無文
士故舊事多畧而塔碑剝蝕盡逸事僅見統記

中所謂荊州碑乃統記夾註所拾耳亦不知碑
為何人作也嘆先蹟之久湮悲文獻之殘闕後
來者彌永彌敝他日摩耶藏骨地焉知不為卜
龜者所奪畧也夫中國之有智者猶西土之有
釋迦也以藏通別圓判一代時教而教意盡以
空假中三觀發明真諦而禪那啟以十疑釋西
方淨土之旨而徃生決夫四字盡四十九年之
微言則馬鳴龍勝所未發也三觀直指心宗攝
無量義海則惠安生什所未詮也約十六觀門

而皆歸之第一義則永明天衣諸大師所共祖
述也蒙爾小邑生此大聖辟彼旨龜值浮木乳
而鄉里後生至不聞其名遺文闕略抑至于此
余友崔生去塔五里近欲募修一院以永此塔
墻宇堂厨之類費青銅將八十千合衆佛子之
力而供一佛母計當不難生第勉為之唯漸而
恒乃可成

板橋施茶疏

繁熱隆寒九十者半渴驢奔泉行人在道當其

炎則燄在喉當其寒則冰在腹取之杯杓之間
而所活者至不可計至若春暖秋明解裝釋馱
遊人踏沙而過羈絆之客傷風烟之頓異而流
光之為塵足也煩懣之時忽此一杯眼若開而
心若釋亦足以少舒其困頓之苦而發洩其羈
旅無聊之况也乎此古人置郵傳餐之旨王以
之所先也茶夏費薪冬費薑其勞費等計一月
費不下二金邑諸宰官主之春秋之費當夏冬
三之二諸居士塞夷及往來客子主之

南都天界寺募田疏

僧供出自分衛佛制也後因乞者不勝煩供者
不勝數而寺田之制始興夫天下之官者商者
工者皆待食於農耕之者一而食之者十農安
得不厲夫官為民策旱潦正疆洫是官未始不
農也夫商為民以穀易錢以舟車通器貨是商
未始不來也夫工為民陶冶鼓鑄織紵創作是
工未始不耨也今夫僧居則辦道行則叅禮無
銖兩之事及民其真能為應供為利生者百不

能一而坐而蠹庾粟者十人而九也夫取百不能一者而皆取給于農則農困監劣僧之敝而併廢福田則僧困此兩弊之道也自隋以來久而不弊者唯寺田一法計僧而田之計田而夫之一畝之入可供一僧一畝之力常借二夫是一畝而供一僧與二農也以其二自給其一以辦官稅坐而食之不為蠹國使天下之為僧者皆借民力以辦禪而其貧無田者復得借僧畝以自食此與官與商與工交相轉者同比之方

維口最為淨食使瞿曇生中國決當易分衛之制而為田也天界寺舊有田今以供院僧而四方行脚不沾孟粒禪者某議買田以供禪衆宰官居士有能共成此舉者於國於農於僧皆有

大饒益此經世之畫也

廬山募緣小引

匡廬之勝峯為五老泉為瀑布巖為獅子文殊澗為青玉峽玉因潭至於幽林邃壑迂回曲折則天池獨臻其奧余自丁酉來入名山者五五

泄以瀑勝天目齊雲以石勝盤山紅螺嶺奇極
矣要以巖壑勝而匡廬皆奄有之所至之地驚
心駭目計此山之石之瀑之巖壑烟巒分身作
十百山猶當與天台雁宕爭勝也天池僧某者
所往必向導余一石一勺皆能言其目詳其委
余往入山有白首不能名一丘者少年上人獨
能耽心水石此一快也山中每年末具合山供
禪者適隸其職同行數衲為余言余囊適竭不
能具檀自惟靳鄂去匡為近又余友孟常兄弟

及吳臯倩在烏而禪者所職得三十千青銅可
辦當不惜也因為述匡山之勝併以此意達之

甃路疏

從斗堤而來儒而館者行脚而菴者傭而灌者
甃而汲者皆道此巷巷凹雨則滯久則溷人趾
之所踐牛羊之所蹂踏漬若膠沒脛少者至臀
計統其衣者一春當費鞮二緡市人雖赤足其
襦襦衫裙污浣之費一日工色且脫傭不灌則
減其直汲者迂道則褻殮不時婦女既至見其

暫則不雅或傾仆則費且屣故議者欲覓此巷
以便往來蓋非獨巾衫者當惜其草至於閭里
屠估下逮賣菜傭兒女子護其禪而醜見其脛
者亦當以數錢見與是亦減費之道是可施也
已

補藏疏

二聖寺藏經余與龔惟學先生次其目惟長先
生補其亡通禪暨諸居士飾其櫝而飽蠹粉者
尚十之五失次者十之三通禪欲詮補之資具

闕鄉之宰官長者始困於造閣既困于治櫝其
合力者不過兩三家且貧通禪不欲重困諸窮
宰官謀為遠募而問策於余余曰此鄉人之耻
也東西南北任錫所至使其人皆笑鄉大夫之
貧且慳不能檀而更布金錢以愧吾鄉是是
亦發露之一也

衆香林疏

官有郵旅有舍僧有叢林此即次之地也郵有
宰舍有主人叢林有接待僧此掌理之人也郵

廩於官舍取辦於客而僧孑然一錫過傳舍則
皂而挺者呵斥等於餓隸投逆旅則囊唯一鉢
又以其緇而髡也不祥急叱之出所謂叢林者
復無所取四方之人非甚不急之繒不投一縷
故接待之難比置菴造像百倍而行脚每至之
處不敢與疥癩爭席至若一遇暴警令首詰奸
而僧徒先遭其虐三木桎梏者比之皆是之皆
叢林之不立以至於此昔石頭道盛時每數十
里置一僧郵而荆最要故叢林稱盛今淨地與

民居襍而僧習為市已不復知難髮為何事大
士之堂每以客豕而客僧至者不得取一粲是
何今昔之懸絕也衆香林創始於念淨居士而
命名于黃太史托于壯來僧某歛而粒之以郵
四方之行脚者此盛舉也敢以告荆之宰官長
者興青原之道而繼劉虬羅舍之業此其時也
經曰客有往來郵常自若荆人勉之

題供僧籍

有募米供僧者有募檀越代供者募米者某講

席某期叢林某功德主某此其施也有據故人
樂供募檀越代供者發願供僧若干今日遇一
人募齋僧幾許明日如之有樂施者即籍名簿
上其人為具供如法畢其數而止僧無貯糧之
煩轉輸之苦主者信其無他亦樂為之供故行
脚之人便之明僧舊有是願青平居士代為乞
言余謂若但欲滿供僧之願而已則如前所云
募檀越代供者其法簡其願易畢明僧酌之

募建青門菴疏

凡山川要會處人士都雅俗華而好義則其間
剏宇必多故今京都吳越精藍基置而文章禮
樂亦甲中夏夫衣統繡而過者入村落則老稚
聚而駭過下邑則士竊議指其背至通都則常
其習固也往余為童子時與諸巾冠者遊見圓
頂而緇者則群指曰楊墨稍長讀子史書旁及
二氏笑曰此何與子輿氏舌而是時士競操觚
業以諛時目故亦習子史及釋老之淺易者士
之入伽藍者揖必至裸見僧乃不怒迨先伯修

既以中秘里旋首倡性命之說函蓋儒釋時出其精語一二示人人人以為大道可學三聖人之大旨如出一家見行脚之稍能談者揖而坐上座事二氏先師有禮而所謂精藍禪室者遂亦數數修飾浸循有大國風青衿之士口者什六身者什三唯一二老儒守陳編久者不復信世雅不重之故不勝也沈生從余講業及熏聞貝典熟甘為瓜渚里人渚中人士習為修雅將開禪舍以客陳門余頽其楣曰青門志里也且

以識下邑之文漸埒上國也夫不知有秋之獲者見人投種則恠曰柰何以可食之物棄之淤泥不知福田之道者亦然渚中人士業知之已慎無惜種語曰臨淵羨魚不若結網

諸天寺募疏

平樂去余村二十里而近平疇碧樹與岡巒相錯大約風景似余村也去冬始一履其地問所謂太歲岡者村民皆曰不知而諸天寺倚高阜剥落荆杞中寺雖敗落而遺蹟未朽過此則為

畦為澤無復一卷疑所倚即太歲岡也寺本供
調御而額以天不稱夫取祈年未央而省署之
侗者知其不合民惑於福田而躋竈於輿此下
凡之通病也昔無盡居士問孔釋孰勝妙喜曰
孔氏師天言必以天為則如來以天為部辟則
臣妾臧獲也余故曰額以天弗稱諸大檀信既
有意丹碧之矣盍併其名正之夫邀令長之福
者寬其稅額復其身而已邀天子之福則為通
侯為卿貳是在諸檀越取之田子曰必也正名

敢為福始謹如所約以告里氓田子名某世為里中望族

題王路菴跡

往來衲子侈談僧郵者曰丹陽曰吳江曰西興而姑蘇之王路菴為最余友死心適從越來談未合齒而菴之鳩材者至持余友錢兼山曹魯川書各一通為質以吳楚地遠不得余一言人未信也余告之曰菴主之願王余令吳時質諸目山居時質諸耳師來又復質諸兩宰官牘余

不敢為妄語緣庶幾檀那以信王路菴者信師
是在師深心與廣長舌而已勉之

公安二聖寺重修天王殿疏

環荊州之精刹以千數而二聖最古具異濟川
居士載之碑甚具邑中雖耆宿莫有知者余童
年過而讀之駭以語吾兄然未知濟川何等入
也後讀五燈始知為不動軒主人妙喜所印可
者徵斯人則二大士之跡不傳即寺亦莫知所
自始也邑中文獻絕無可考自有茲邑來姓名

一無見史冊者流寓宦蹟稍稍有之而亦不詳
子史所載至不能舉其名至於子貞少陵之屬
稍名之已而羞藻之義闕然僅僅一智者禪師
為邑產邑人多不知記者述其所自或曰潁川
人不知其先以公封邑而至也獨荊州碑中載
有茅穗油河事可為的據而茅村之聖母塔石
級如故然邑人已不知為誰家封鬣耕耨耘樵
者日侵削不止其不為鑱刃礪石者或亦髯將
軍呵持之耳蓋邑人之不好事久矣寺始末載

碑中故不贅舊址為江所齧自拊園移來三十
餘年去歲始新其垣天王殿架朽而業之有其
名耳寺故以二大士現忿怒像故置四天不貌
而空其殿夫空之是已余意當範智者大士其
中益以遠上人寶珠之属併祀呂庾而下諸大
宰官客子及茲邑道德文行之超越者使來者
一入斯堂而文獻宛然在目亦士林之一快也
夫四天子以護法著稱諸禪伯天子之所禮也
王臣宰官遺教之所囑累所以助四天子於明

明者也諸君子悼文獻之久湮思盛事可以義
起也雖微福田遽寧挈然已乎靈公善語邑長
者於予言必有合也

募作板橋

十一月杙十二月梁車蹄格格以驅以行維茲
紅板軌不得方木糟塊圯永遠道長稽首哲人
開箱啟囊無偏無頗來者堂堂題籍伊誰曰東
省卽厥歲在寅厥律始商

題請藏疏引

雪浪之高足曰某去秋詢余柳浪遂入蜀謁傳
大士因得縱觀播形勝還為余言余笑曰是昔
為無巖足王國土今遂為慈氏樓閣煙水是同
顧童子勿生二想也復窮其所之曰將壯入燕
遍叩諸大檀乞靈文一藏歸雲浮山願居士為
引其端於是石公為之說曰師遊雪浪胸有
全藏欲楷後學名言是伏維雲浮山徧吉所相
霞光烟靄現六牙象於赫天子以慈德王黃卷
赤軸施彼萬方行矣善材當仁不讓如龍乘雲

如鳥入曠白馬歸來為法中將稽首大檀歡喜
是望作智慧因佛種無量

晉光寺疏

茅穗佛所自出震旦之法由之以興荊州碑所
載與統紀雖不甚合然覈其名與其故蹟智者
為里人無疑也今里中人指其近似皆附會夫
師或云智者於里中建名刹六而晉光報本南
觀音皆是智者嘗云建寺三十六疑此亦在夫
師以酬恩南還此地乃其生緣安得無刹造台

教東渡中國之人至不知有三觀而錢氏王臨
安始還故物大師之迄晦而不章久矣夫中國
學者至并其教而亡之而何有於尺椽寸塊也
且孱陵自隋唐迄今代人物寥寥文采著聞不
得一指中間闡宗乘者亦纔得一二衲要之門
庭互異則又非彼門下客也普光寺顏久矣近
邑長者多談禪那諸鄉落所謂藍舍者皆雲興
而大師所創立尤屬意焉里大姓競為光復且
曰值今大有年半村落中可具無煩他舍以告

袁子袁子曰去聖人之居若此其近也以其時考之則可矣

菩提寺疏

菩提寺余一再至其地比他刹為淨今之所謂刹者名雖精藍實則禽檻豕狎也又其上則糟丘澠汁也甚或青豆之房以貯黛綠雨花之館以奏淫哇而菩提寺以少僻遠遂無復此穢然門殿皆不甚飾寺僧以余舊遊乞余為引余曰此淨地諸檀那所習也余言何足重諸上人第

以淨因感之無弗得矣

德山僧募修地藏閣引

法處嚴寶池瞿曇現穢方唯有藏大士刀火作
家鄉閻浮提衆生念念迫炎湯開眼與閉眼俱
伏大士光動念即泥犁遠不隔尋常以我念不
淨致彼劫茫茫辟如四方空因方作短長窮方
不可盡空亦不銷亡我来禮德山金聚拜空王
渺渺白蓮社莫莫青豆房靈鐘存古閣騫舉若
烏翔咎斑生繡題溜雨駁金床行道猶不忍給

終豈相忘稽首大檀那丹碧借輝煌露電理歸
盡繁華夢幾場失足劒戟林舉手得清涼

德山僧募裝毘盧像引

花藏無形段毘盧亦不實如塗粉虛空如雕鏤
雲物云何雜花內藏塵現尊特德山妙嚴閣名
為毘盧設中實無毘盧如舜若多質舌相出風
柯慈容現沼月蒼巒與秋渚敷演無間歇我以
無眼觀觀處離林樾衆生全眼塵云何得超越
我我丈六像金土恣裝捏花冠耀青髻寶衣披

古摺低頭及合掌恒河沙功德窮子背慈父百
城間經歷無實不由權佛性緣可得一彈指莊
嚴萬劫黃金色他時見毘盧莫道無交涉

募修文村真武廟引

文村沙嘴突江生怒波直齒孱陵城披髮大士
伏劍行盤渦曳出古蛟精老涎入艸沙石腥青
獮猴鏢川波平雕題紅楯碧軒楹鑄金冶鍊玄
宮成霜摧雨折歲屢康楳梁額上菌芝生行道
過者涕淚零道人稽首叩階庭青錢赤灰出箱

盤綿絲一縷沙一星
毘沙天子作証明紅髯碧
眼靈官靈

題光中鳩材小冊

珊瑚為堂木難室荷葉山頭雲似壁
金色頭陀倚花立
番鐵拄杖青皮笠
辭我遠入湖湘澤
杞梓梗楠被天黑
青髻白面盡檀越
老去髡頭少作客
驀地相逢如舊識

募修吳氏橋小引

澗如帶流且駛
杠梁不飭塗者死
舊鬼嗷嗷喚

新鬼小人無和君子耻橋南橋北皆仁里濟川
題柱從此始

題承天寺募冊

西風夜吼君章宅蘭死叢枯覓不得一丈艸深
欄楯寒寶池波湧車磔裂勝蓮國土化如來飛
溜濺面髻堆灰試語王舍城長者慚愧金銀佛
寺開

題龍堂寺僧募冊

龍堂飛雨濺窓濕苔色斑斑生古壁彫疏半毀

柱蒿立漏痕界徧黃金色衲子欲言面羞澁試
介烏紗作檀越積露為波江可得東隣北里賢
相識山自銖忽大千伯等一金田無差別掃却
莓苔貯空月琉璃地上光澄徹

禪堂募麥引

綠疇初滿黃雲甫截浮空麥浪如海斯湧滿車
污邪似雷之殷當斯時也折楊黃花之歌遍于
井間缸面甕頭之春溢彼堂榭而應供大士腰
懸空盎赤髭淨侶枵然盈塗是可忍也心實憫

之厥有白足分衛諸方寧爾余踵填彼飢壑仁
人之心儒者所與敢不圖之用弁首簡

書檀度和尚艸菴引

檀度和尚告我曰去邑百里為站過五里為黃
鐘堡有居士願捨地一區以待去衲不敢言僧
郵僅一歇足比于官舍則無供具比于店肆則
不取錢當其至則逆旅即主人也來若歸舍當
其代則主人亦逆旅也去若脫屣不剪茅粗備
風雨而已不墁飾泥土而已敢煩長者引其端

袁子聞而笑曰有是哉明春入衡嶽當偕數衲
過汝且觀汝新改又觀彼土居士信根生熟如
何若果善人多也雖不佞亦願擔瓢歌笠婆娑
乎其間也

髯僧銅塔冊

胡僧碧眼鬚三尺風吹冉冉掛金錫黃金範塔
等山齊走遍諸宮與湘澤南中冠帶簇如雲誰
是堆沙老阿育衲衣三度敝秋風又踏峨眉千
仞碧蜀山銅鐵走華夷高舫林林同瓦礫是中

應有大心人橐可頃翻手可鄭壘矣之為有驚

子莫道分衛去如織

衆香林冊

衆香國裏花深處
鸚鵡迦陵旃檀樹
子山樓北色堆嵐
中有峨眉大士路
禪關隘塞宇傾欹
金錫如雲掉臂去
幾人曾徑落帽山
誰家不上龍洲渡
二十一萬肩摩國
揮汗成雨袂成霧
戶擲一錢丁一絳
梗梓豫章頃刻具
赤面修髯怒者誰
布金長者驀相遇

雙田寺冊

雙田開山自李唐雷焰推為瓦礫場
菱荇誅杞作雲堂鏡水不波菱荇香
蘆荻花飛滿寺霜刺株為佛如人長
辟支羅漢儼成行頸腮不辨臂怒張
腰弓背曲色沮藏皺皮皺目苔蘚裝
黃面老子面不黃雪山行苦骨羸羸
羸有大心檀越王銅山金埒珠倉箱
入門四顧淚徬徨融膏冶液苦四方
三十二相亦何常稽首誰家無橐囊
東村西社皆蓮鄉

徐景鳳元輝叅訂
門人表升度無涯初校
吳士冠相如手書

瀟碧堂集卷之十六